

Internet aslöm ćina La Ila

Do la sajun da d'isté va inant i laürs por l'internet aslöm tla Val Badia. Le pröm de chisc laürs é chël da mëte jö i rös danter Picolin y La Ila. Tosc dedò gnaràl trat tres i cabli de fires otiches.

I laürs por mëte jö i coliamënc de internet aslöm da Picolin a La Ila reverda feter 10 kilometri. Ajache la Junta provinciala s'à tut dant da arjunje ćina ala fin dl ann vigni comun dl Sudtirolo cun les fires otiches, jaràn tla Val Badia atira inant

cun le proscimo vare. “La preparaziun tecnica é tan co stlùta jö y a chësta manira podaràn d'altonn atira trà tres i cabli de fira otica”, spliga l'assessor provincial de competënza. Canche la Provincia sarà rovada ćina te vigni comun cun i cabli é spo la Telecom che mëss adatè i aparac tles zentrales dl telefonn. Tl raiun dailò dlungia podarà la jënt ciafè l'internet aslöm incè tres i vedli cabli dl telefonn. Les ćiasas che é plü dalunc dales zentrales adora ćiamò val' tòch de

coliamënt de fires otiches. Chësc ultimo tòch, l'ultima milia, mëss la Provincia ti lascè fà por lege ai comuns.

Le colegamënt por l'internet aslöm tla Val Badia é bele arjigné da San Laurënz ćina a Al Plan de Mareo. Le tòch danter Longega y Picolin vëgn fat en colaboraziun cun l'amnistraziun di bosć che é bele tl laür da fà le tru dles rodes. La proietaziun por le tòch da Picolin a San Martin é bele rovada y incè por chësc tòch podaràn sëgn jì inant cun les prozedöres por scrì fora i laürs.

De plü informaziuns sön la rëi dl internet aslöm tl Sudtirolo é da ciafè sön www.provincia.bz.it/breitband. ■



Por portè l'internet aslöm te dōta la Val Badia gnaràl ciavè sō da Picolin ite por podèi mëte jö i rös dles fires otiches

Internet aslune da Ciastel nchin te Gherdëina

I lëures per purté i culegamënc internet aslune da Ciastel nchin te Gherdëina à scumëncia. Tla valeda iel bele de bon culegamënc internet, ma chisc ie de avèi dla sozietà dal telefonn y perchël lëura la Provincia nce te Gherdëina per garanti na rë de fibra otica tl daunì.

Danter Ciastel y Runcadic vëniel te na prima fasa de lëures metù ju la roles per pudèi pona te n secondo mumënt tré tres i cabli de fibra otica. I culegamënc che ie bele te Gherdëina ie plutosc vedli: “Cialan al daunì iel nce tlo de bujën

de fibra otica a na maniera che la istituzions y pona nce i privac ebe la garanzia de culegamënc che va debota” spiega l respunsabl technich dla Provincia.

I lëures che n ie tl lëur de realisé reverda n toch de passa 10 kilometri da Ciastel nchin a Runcadic. Per chësc culegamënt à la Provincia udù dant na nvestizion de passa na milion de euro. Da Runcadic inant à la Comunità raionela y l Chemun bele metù ju n toch de roles canche l ie unì fat la streda dala rodes. ■

Web-TV ladina

Produziuns de televizion per ladin finanziedes dala Provincia da udèi per duc: chësta puscibltà vën sën data tres internet sun l canal Youtube dla Provincia de Bulsan.

La produziuns de televizion prejènta la mendranza ladina a na maniera da udèi y scuté su drèt da plajèi. Cuntenuc d'ert y cultura, economia, scola, soziel ma nce vel fiction ie bele unic laurei su te truepa produziuns televijives y vën lascedes udèi a mo n majer publich. Sun la plates www.youtube.com/ProvinciaBulsan posson sën n iede udèi de plu trasmiscions dla lingia “Scenar”, “Euro TV”, “Deboriada” y “Orizont”. Do y do uniral nce publicà trasmiscions dla lingia “Nosta scola” y mo d'otra produziuns singules.

L secondo fin dla plataforma nueva ie chël de pitè mo plu trasparënza da pert dla Provincia de Bulsan. “La produziuns che publicon tres internet ie unides finanziedes dal 55 al 90 percënt dala Provincia de Bulsan” spiega l assessor ladin. ■

Co che vën l tēmp tl raion ladin

L servisc dla previjions meteo ne ie nia me l servisc plu nuzà dala popolazion dl Sudtirolo, nce la jënt ladina se nuzea for de plu chèsc servisc te si rujeneda. Do nuef mënsche che l fova unì nvià via na verscion ladina, vëniel sën nce pità previjions specifiches per l raion “Ladinia – Dolomites”.

Alexander Stuffer

Cun la previjions dl tēmp tl raion ladin à la Provinzia arjont doi obietives: pitè n servisc specifich ala jënt di luesc ladins y tl medemo mumënt ti dé prejënza ala mendranza ladina tl servisc provinziel plu nuzà.

L raion nuef “Ladinia - Dolomites” vën pità tla trèi rujenedes ladin, tudèsch y talian. La plates web dl servisc meteo ie ntan l ann passà unides vijitedes 33 milion de iedesc, che fej ora 90.410 vijites al di. Ma la previjions meteo ne vën nia me fetes al savèi tres la plates internet: uni un possa nce se abuné a n servisc tres e-mail. “La stazion dal tēmp a San Martin de Tor nes dà i valores de referimënt per fè la previjions tl raion nuef” spiega i meteorologhes dla Provinzia. La previjions per raions vën atualisedes uni di dala 9 da duman y vën tl medemo mumënt nce mandedes ora per e-mail ai abu-



Nchinamei pra la previjions meteo ti dà la Provinzia de Bulsan valor ala mendranza ladina: la partizion nueva di raions.

L servisc meteo per ladin ie unì ngrandi y vën prejentà sun la plata nueva www.provincia.bz.it/meteo-ladin

nei. Da nuef iel nce che chësta previjions di raions vën mandedes ora tla trèi rujenedes.

Do nuef mënsche che l fova unì scumencià a publiché la previjions meteo tla rujeneda ladina, te na verscion plu scēmpla per i smartphone, iel unì ngrandi l servisc. Al'adres www.provincia.bz.it/meteo-ladin posson sën udèi na plata nueva, adateda per l computer, cun de miëura grafiches sciche per ejēmpl l radar dala plueia o la cameres web.

L servisc meteo ngrandi tla rujeneda ladina à n valor dopl: “Da una pert ti pieta la Provinzia inò n servisc nuef ala jënt ladina y davia che chèsc vën nuzà damat truep da dut l Sudtirolo y dai turisc, ti dal na majera visibltà a nosta mendranza” sorissee l Assessëur ladin.

Da nuef sun la plata ladina dl Servisc meteo iel n iede i servijes che taca prò pra la previjions. Tlo posson se abuné debant ala previjions tres e-mail, al servisc RSS o se tò ju n widget tres chël che uni un possa giapé la previjions meteo per ladin nce sun na si plata internet persunela. Tla rubrica di valores

atuei posson dlongia la stazions dal tēmp (nce a San Martin, Sëlva y Piz Pisciadù), sën nce udèi la mesurazions dla stazions dal'ega. Tl raion ladin ne n iel nce una a Puntives y a Mantëna Todëscia. Na nuvità de mpurtanza da pont de ududa dla rujeneda ie la rubrica cun la spiegazion de 40 esprescions dla terminologia meteorologica.

L ngrandimënt dl servisc meteo per ladin ie l resultat de na culaburazion danter l Servisc de Comunicazion, l Ufize per cuestions linguistiches y la sozietà de nformatica SIAG.

Do nuef mënsche che l vën nce pità la previjions meteo tla rujeneda ladina posson udèi che la jënt se les nuzea truep. L servisc meteo à te chèsc tēmp arjont 20.877 vijites cun na media de 2.319 al mëns. Ultimamënter ie l meteo-ladin unì vijità mo de plu arjunjan tl ultimo mëns 3.657 vijites. ■

info

Previjions meteo per l raion ladin
www.provincia.bz.it/meteo-ladin/ladinia